

mit ertrich und raum ufsgefült worden. Wie aber das waser
und die nesse nach und nach sich in das ertrich gesetzt,
do hat es letstlich die mauren anno 1563 über und für den
berg hinaufs getruckt; aber in nachgenden jaren hat er
5 solche maur vom grundt widerumb ufgeführt.

**Von dem Butschen und des alten herren seltsamen
weis, auch von etlichen ungeheuren sachen, die sich
zue Eberstain, Mösskirch und an mehr orten begeben
haben.**

10 Grave Gotfridt Wernher von Zimbern hat vor jaren ein
vogt zu Wildenstain gehapt, war von Guetenstain pürtig,
der het auch etlich jar darvor den forst versehen, und hiefs
Hanns Hugkle. Nach deselbigen absterben überkam er ain
andern vogt, ein frommen, erlichen man, hiefs Hanns Butsch.
15 Der het im auch etliche jar trewlichen und wol gedienet.
Nach dem schmalkaldischen krieg aber name er in von
Wildenstain hinweg und übergab im das kelleramt im schlofs
zu Mösskirch. Daran blib er über zwai jar nit, dann der
alt herr und diser Butsch kunten sich nimmer mit ainandern
20 vergleichen. Der alt herr war wunderbarlich und seltsam,
so war der Butsch alt, verdrosen und vergissnig; zu dem
wolt der alt herr, daz sich der Butsch wolredens solt be-
fleisen, so het derselbig weder sinn oder muet darzu. Ich
hab gesehen, das diser alt man mehrmals uf der schlofs-
25 brugken mer, dann ein stundt oder zwo, parhaupt hat sten
oder geen müesen und mit dem alten herrn hinauf sprachen,
in aller kelte, regen oder schnee. Also hat er sich ein guete
zeit lang dieser seltsammen weis halben vil erleiden müesen.
Kam letstlich dahin, das er sich also kümert und jammert,
30 daz er, wie man besorgt, in ain verzweiflung gefallen, dar-
von im alle red vergieng. Vil haben vermaint, es hab in
der gewalt Gottes also getroffen, das er nit mer reden kün-
den. Das mag nun sein, oder nit, ich aber bin allwegen
und das user allerlai ursachen der mainung gewesen, das
35 er ein demonium mutum bei sich gehapt, welches im die
redt also verhalten. Er hat zu zeiten, aber doch gar selten,
mit seinem weib geredt und wardt nachgends zu Mösskirch
im spital erhalten. Darin ist er über ain viertel jars nit
bliben, do ist er gestorben. Hat, wie man sagt, ein hörten,

36 verhalten] so wohl, hs. halten.